

## COMUNICÂT STAMPE

### RICERCJE SU LA CONDIZION SOCIOLINGUISTICHE DAL FURLAN

## MIL E DUSINTE INTERVISTÂTS PAR FOTOGRAFÂ IL STÂT DE LENGHE E ORIENTÂ LIS POLITICHIS DI TUTELE E PROMOZION

### Melchior (UNIUD): rare in Italie une ricercje di cheste complessitât

Udin, ai 12 di Avrîl 2013 – Al è jentrât tal vîf il grant scandai sociolinguistic che al è stât comissionât de ARLeF- Agenzie regionâl pe lenghe furlane ae Universitât di Udin e che al à tant che finalitât la fotografie inzornade su usancis, compartaments, opinions, cognossincis e ûs leâts ae lenghe furlane.

A saran mil e dusinte lis personis cjapadis dentri te rilevazion par mieç di un cuestionari strutturât che al vignarà presentât cun intervistis personâls che si davuelzaran par talian o par furlan a cjase dal intervistât.

I intervistadôrs a tocjaran 72 Comuns dal Friûl: 32 in provincie di Udin, 20 in chê di Pordenon e altris 20 in chê di Gurize.

"E je une ricercje cuntune complessitât cetant grande - al comente il prof. Claudio Melchior, coordinadôr dal scandai pe Universitât dal Friûl - e che da râr e je stade fate a chest nivel di aprofondiment. Cumò o sin daûr a sierâ lis proceduris di afidament dai bants publics e la selezion dal campion di intervistâ in colaborazion cun lis aministrazions comunâls. Une volte che o varin fate comunicazion al campion cuntune letare alore si jentrarà - al fâs savê Melchior - te fase autentiche di rilevazion".

Il teme de tutele e de difusion de lenghe furlane al vignarà scandaiât cul aprofondiment dai codiçs linguistics des diviersis situasions sociâls (familiârs, di amicizie, comunitariis, strumentâls, professionâls, publichis, uficiâls e vie indevant), lis disposizions viers culture e lenghe furlane (tacament, afiet,

indiference e vie indevant), lis opinions e i judizis sul lôr avignî e rispiet ae lôr introduzion te scuele, tai media e te vite professionâl e publiche.

In region, jenfri lis principâls ricercjis sul argoment condusudis tai ultins trente agns, a son stadis chês realizadis dal ISIG- Istitût internazionâl di sociologjie di Gurize tal 1977 (slargjade a dutis lis feveladis de region) e tal 1986 (riferide dome ae provincie di Udin) e, infin, chê dal 1999 de Universitât dal Friûl che e je propit la fonde e il pont di riferiment pal scandai di chest an.

"O vin ritignût util - al spieghe il diretôr de ARLeF, William Cisilino - di dâ continuitât a chestis precedentis ricercjis e verificâ i mudaments che a son sucedûts tal ûs e tes opinions su la lenghe, considerant ancje i proviodiments legislatîfs di tutele e promozion dal furlan che a son stâts fats bogns sedi a nivel talian che regionâl. Il studi - al zonte Cisilino - al coventarà par meti adun informazions e indicazions par fâ une programazion plui coerente e eficiente pe tutele de lenghe".

I rapuarts definitîfs, che a saran pronts pal mêis di Otubar di chest an, a saran cuatri, dividûts par provincie di Gurize, Pordenon, Udin e Friûl intîr.

*Elisabetta Pozzetto*

Region Autonome Friûl Vignesie Julie  
[ARLeF - Agenzie Regionâl pe Lenghe Furlane](#)  
Place ai XX di Setembar 23  
33100 Udin  
0039 0432 555724 fax 0432 204158 mob 0039 335 8002058